



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

Broj: 01-GV-02-128/24
Sarajevo, 24.01.2024. godine

Na osnovu člana 31. stav (1) tačka b) i člana 77. stav (1) Statuta Grada Sarajeva („Službene novine Kantona Sarajevo”, broj 7/23), Gradsko vijeće Grada Sarajeva, na 35. sjednici održanoj dana 24.01.2024. godine, primilo je k znanju

Informaciju o realizaciji vijećničkih pitanja i inicijativa.

PREDSJEDAVALJUĆI GRADSKOG VIJEĆA

Jasmin Ademović, s.r.

Adresa: Hamdije Kreševljakovića 3
71 000 Sarajevo
Tel.: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba





Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADONAČELNICA

INFORMACIJA
O REALIZACIJI VIJEĆNIČKIH PITANJA I INICIJATIVA

Sarajevo, januar 2024. godine

Adresa: Hamdije Kreševljakovića 3
71 000 Sarajevo
Tel.: +387 33 407 443
Fax: +387 33 208 341
Email: grad@sarajevo.ba
Web: www.sarajevo.ba



Informacija o realizaciji vijećničkih pitanja i inicijativa

I UVOD

Programom rada Gradskog vijeća Grada Sarajeva za 2024. godinu za mjesec januar, planirano je razmatranje Informacije o realizaciji vijećničkih pitanja i inicijativa.

Informacija sadrži pregled odgovora na vijećnička pitanja i realizaciju vijećničkih inicijativa.

Članom 148. Poslovnika Gradskog vijeća Grada Sarajeva („Službene novine Kantona Sarajevo“, broj 28/09, 11/20 i 19/20), propisano je sljedeće:

„Član 148.

- (1) Svaki gradski vijećnik, klub vijećnika ili radno tijelo Gradskog vijeća mogu postaviti vijećničko pitanje ili inicijativu određenom subjektu.
- (2) Na svakoj sjednici Gradskog vijeća posljednja tačka dnevnog reda je tačka: Vijećnička pitanja i inicijative.
- (3) Vijećnička pitanja i inicijative se postavljaju usmeno ili pismeno na sjednici Gradskog vijeća, a kada se to od Gradskog vijeća zatraži i to Gradsko vijeće podrži većinom glasova izabranih gradskih vijećnika, iznesena inicijativa postaje inicijativa Gradskog vijeća.
- (4) Postavljena vijećnička pitanja i inicijative se formuliraju u pismenoj formi kao poseban akt Gradskog vijeća i dostavljaju nadležnom organu na razmatranje.
- (5) Nadležni organ Grada Sarajeva kome se vijećničko pitanje ili inicijativa dostavi na realizaciju dužan je dostaviti odgovor na postavljeno vijećničko pitanje iz nadležnosti organa Grada Sarajeva do naredne sjednice Gradskog vijeća, odnosno o realizaciji upućene inicijative iz nadležnosti Grada Sarajeva izvijestiti Gradsko vijeće do naredne sjednice.
- (6) Ukoliko pitanja odnosno inicijative nisu iz nadležnosti Grada Sarajeva, odnosno nisu upućene gradonačelniku, Služba Gradskog vijeća će ih proslijediti nadležnim organima i o tome izvijestiti Gradsko vijeće.
- (7) Na svakoj sjednici Gradskog vijeća podnosi se informacija o realizaciji vijećničkih pitanja i inicijativa, u sklopu obavezne tačke dnevnog reda sjednice.“

II PITANJA, INICIJATIVE I ODGOVORI

Informacijom o realizaciji vijećničkih pitanja i inicijativa obuhvaćena je realizacija vijećničkih pitanja i inicijativa koje su dostavljene gradonačelnici, i to: Vijećnička pitanja i inicijative sa 28. sjednice Gradskog vijeća Grada Sarajeva održane 31.05.2023. godine, Vijećnička pitanja i inicijative sa 29. sjednice Gradskog vijeća Grada Sarajeva održane 26.06.2023. godine, Vijećnička pitanja i inicijative sa 30. sjednice Gradskog vijeća Grada Sarajeva održane 26.07.2023. godine, Vijećnička pitanja i inicijative sa 31. sjednice Gradskog vijeća Grada Sarajeva održane 27.09.2023. godine, vijećnička pitanja i inicijative sa 32. sjednice Gradskog vijeća Grada Sarajeva održane 25.10.2023.

godine, i Vijećnička pitanja i inicijative sa 33. sjednice Gradskog vijeća Grada Sarajeva održane 29.11.2023. godine, kao i vijećnička pitanja i inicijative upućene na ranijim sjednicama Gradskog vijeća Grada Sarajeva, a čiji su odgovori pristigli u toku sačinjavanja informacije.

Najveće interesovanje, kao i broj upućenih pitanja i inicijativa, odnosio se prema Gradskoj službi za urbano planiranje, investicije, stambene i komunalne poslove, kao i Gradskoj službi za lokalno poslovanje. Također, određeni broj postavljenih vijećničkih pitanja i inicijativa koje su dostavljene gradonačelnici Grad Sarajeva odnosio se na druge subjekte, odnosno na tzv. „vanjske adrese“. Istovremeno, za određene inicijative potrebno je planirati i finansijska sredstva za realizaciju istih. Određeni broj vijećničkih pitanja i inicijativa dostavljen je gradonačelnici Grada Sarajeva na znanje.

Odgovori na vijećnička pitanja i inicijative su dati kako slijedi:

- 1. Na 28. sjednici Gradskog vijeća Grada Sarajeva**, održanoj dana 31.05.2023. godine, predsjedavajući Gradskog vijeća Jasmin Ademović uputio je inicijativu broj 01-GV-02-821/23 od 29.05.2023. godine.

„Potrebno je da gradonačelnica predloži odluku Gradskom vijeću kojom će se Kalendar obilježavanja datuma i događaja od značaja za Grad Sarajevo dopuniti i obilježavanjem obrane Centra za obrazovanje kadrova MUP-a R BiH 05. aprila 1992. godine i ubistva šesnaestogodišnjeg učenika Samira Mašića koji je bio prva žrtva napada na Centar. Upućuje se inicijativa i nadležnim organima Kantona Sarajevo da na odgovarajući način uvrste obilježavanje ovog događaja među događaje koje Kanton redovno obilježava svake godine.

Gradsko vijeće Grada Sarajeva podržalo je ovu inicijativu te je ona postala inicijativom Gradskog vijeća.

Odgovor:

Obavještavamo Vas da je u Kalendaru obilježavanja datuma i događaja od značaja za Grad Sarajevo, pod tačkom 6. Dan Grada Sarajeva, Prvi napad na Sarajevo /06.04.1992./, u rubrici Način obilježavanja, događaj već uvršten na način da je predviđeno polaganje cvijeća u Policijskoj školi Vraca.

U prilogu se dostavlja stranica 2 Kalendara obilježavanja datuma i događaja od značaja za Grad Sarajevo.

- 2. Na 29. sjednici Gradskog vijeća Grada Sarajeva**, održanoj dana 26.06.2023. godine, gradski vijećnik Toni Vukadin uputio je inicijativu sljedećeg sadržaja:

„Potrebno je da se tokom mjeseca augusta omogući besplatna vožnja Trebevičkom žičarom i besplatno korištenje bazena za djecu osnovnih škola Sarajeva.“

Odgovor:

Navedena inicijativa proslijeđena je dana 14.07.2023. godine JP „Olimpijski bazen Otoka“ d.o.o. i JP „Sarajevo“ d.o.o. Nakon što dobijemo odgovor, bit ćete blagovremeno obavješteni.

- 3. Na 29. sjednici Gradskog vijeća Grada Sarajeva**, održanoj dana 26.06.2023. godine, gradska vijećnica Alma Čengić u povodu razmatranja Prijedloga Odluke o dopuni Kalendara

obilježavanja datuma i događaja od značaja za Grad Sarajevo, uputila je inicijativu sljedećeg sadržaja:

„Potrebno je u Kalendar obilježavanja datuma i događaja značajnih za Grad Sarajevo uvrstiti obilježavanje 12. augusta – Međunarodnog dana mladih, što bi bilo u skladu sa kandidaturom Grada Sarajeva za status Evropske prijestolnice mladih.”

Odgovor:

U cilju realizacije navedene inicijative, potrebno je da predlagač dopuni podnesenu inicijativu na način da se odredi u kojem dijelu se dopunjava Kalendar obilježavanja datuma i događaja od značaja za Grad Sarajevo, kao i nosioca obilježavanja i način obilježavanja.

4. Na 29. sjednici Gradskog vijeća Grada Sarajeva, održanoj dana 26.06.2023. godine, gradski vijećnik Toni Vukadin uputio je inicijativu sljedećeg sadržaja:

„Potrebno je da se pjesma 'Sarajevo ljubavi moja' koju je napisao Alija Hafizović Haf, a muziku napisao i izveo Kemal Monteno, proglasi svečanom pjesmom Grada Sarajeva, uz ispunjenje preduslova za realizaciju inicijative.”

Gradsko vijeće je na 30. sjednici podržalo ovu inicijativu, te je ona postala inicijativom Gradskog vijeća.

Odgovor:

Stručna služba za poslove kabineta i poslove Gradske uprave – Odjeljenje za kabinetske poslove, pokrenula je aktivnosti u cilju stvaranja preduslova za realizaciju navedene inicijative. S tim u vezi obavještavamo Vas o sljedećem:

- U kontaktu sa Asocijacijom kompozitora muzičkih stvaralaca – AMUS kojima smo se obratili putem e-maila u vezi navedene inicijative, obavještani smo da je gospodin Alija Hafizović član Hrvatskog društva skladatelja ZAMP, te da je potrebno da se njima obratimo kako bi stupili u kontakt sa nasljednicima u vezi reguliranja, odnosno davanja saglasnosti na korištenje autorskog djela.
- Slijedeći gore navedene upute, putem e-maila obratili smo se Hrvatskom društvu skladatelja ZAMP koji su naš mail prosljedili nasljednici gospodina Hafizovića.
- Nasljednica gospodina Hafizovića, gospođa Vanja Fundić Hafizović, u svom odgovoru na e-mail povodom navedene inicijative, obavijestila nas je da kontaktiramo nasljednike autorskih prava Kemala Montena (obzirom da su ista prenesena na gospodina Montena), te da se za daljnje uslove/procedure obratimo Hrvatskom društvu skladatelja ZAMP čiju su članovi i gospodin Hafizović i gospodin Monteno.
- Ponovnim obraćanjem Hrvatskom društvu skladatelja ZAMP u vezi sa gore navedenim, obavještani smo, obzirom da se radi o individualnim pravima, što nije pod ingerencijom Hrvatskog društva skladatelja ZAMP da se direktno sa nositeljem prava dogovaraju uslovi korištenja autorskog djela, te s tim u vezi naš e-mail prosljeđen je nasljednicima gospodina Montena. Također, od strane Hrvatskog društva skladatelja ZAMP obaviještani smo da se za prava treba obratiti i nakladniku Croatia Records Music Publishing.
- Dana 05.09.2023. godine kontaktirani smo od strane kćerke gospodina Montena, gospođe Adrijane Monteno, a u vezi sa korištenjem autorskog djela. U telefonskom razgovoru, gospođa Monteno iskazala je zainteresovanost za navedenu inicijativu, s tim da će se sa detaljima u vezi da davanjem saglasnosti za korištenje prava na autorsko djelo očitovati pismenim pute, što da momenta sačinjavanja ovog odgovora nije učinjeno.

Napominjemo da, ukoliko dobijemo saglasnost od nasljednika autorski prava za korištenje autorskog dijela za pjesmu „Sarajevo ljubavi moja“, sa istima je potrebno zaključiti Ugovor o pravu korištenju autorskog djela kojim bi se pobliže definirali uslovi, način i eventualna novčana naknada za korištenje istih.

Također, sugeriramo da će, ukoliko dođe do realizacije navedene inicijative, odnosno ukoliko Gradsko vijeće Grada Sarajeva donese Odluku da pjesma „Sarajevo ljubavi moja“ bude svečana pjesma Grada Sarajeva, biti potrebno pristupiti eventualnoj prethodnoj izmjeni Statut Grada Sarajeva, obzirom da bi Grad Sarajevo pored obilježja koja su definisana Statutom Grada Sarajeva imao još jedno obilježje, a to je svečana pjesma Grada Sarajeva.

5. **Na 29. sjednici Gradskog vijeća Grada Sarajeva**, održanoj dana 26.06.2023. godine, gradski vijećnik Srđan Srdić uputio je inicijativu broj: 01-GV-02-998-1/23, od 26.06.2023. godine, koja je, između ostalog, imala sljedeći sadržaj: *Potrebno je da Grad Sarajevo finansijski podrži sanaciju oštećenja makadamske putne komunikacije Ustikolina, selo Prisoje, u dužini od 2,5 km, a po već upućenom zahtjevu Gradu Sarajevu ispred Opštine Foča-Ustikolina, odnosno mještana povratničkih sela Prisoje, Grabovik i Gradišići.*

Odgovor:

Odlukom o realizaciji novčanih sredstava, Općini Foča odobrena su sredstva u iznosu od 10.000,00 KM, kao vid pomoći u realizaciji Projekta sanacije putnog pravca Tulovići – Prisoje.

6. **Na 30. sjednici Gradskog vijeća Grada Sarajeva**, održanoj dana 26.07.2023. godine, Komisija za ljudska prava i slobode uputila je inicijativu sljedećeg sadržaja:

„Komisija za ljudska prava i slobode upućuje inicijativu gradonačelnici Grada Sarajeva da u medijima javnog informiranja i društvenim mrežama promovira obrazac putem kojeg se preko službene stranice Grada Sarajeva građani mogu obratiti ovoj komisiji s ciljem zaštite ljudskih prava (npr. objaviti informaciju ili poziv građanima na portalu Klix.ba, ili nekom drugom portalu sa kojim Grad surađuje, a za koji se evidentira veliki broj posjetilaca)“.

Odgovor:

Odjeljenje za odnose s javnošću, uz podršku nadležnih službi, pripremlilo je popratni tekst o zaštiti ljudskih prava, a koji bi išao uz obrazac na službenoj stranici Grada Sarajeva: www.sarajevo.ba

Potrebno je da Komisija za ljudska prava i slobode Gradskog vijeća Grada Sarajeva Odjeljenju za odnose s javnošću dostavi obrazac u elektronskoj formi i mail na koji bi stizale eventualne prijave građana, organizacija.

7. **Na 30. sjednici Gradskog vijeća Grada Sarajeva**, održanoj dana 26.07.2023. godine, Odbor za lokalni biznis i turizam uputila je inicijativu sljedećeg sadržaja:

„Odbor za lokalni biznis i turizam upućuje inicijativu gradonačelnici da razmotri mogućnost formaliziranja saradnje Grada Sarajeva i Grada Splita kroz određeni vid sporazuma o saradnji.“

Odgovor:

Stručna služba za protokolarne poslove, odnose s javnošću i međunarodnu saradnju pokrenula je aktivnosti u smislu uspostavljanja kontakta sa Gradom Splitom po ovom pitanju. U toku je priprema pisma namjere i prijedloga sporazuma o saradnji koje će biti upućeno

gradonačelniku Grada Splita na razmatranje. Obostrano usklađeni tekst sporazuma bit će pripremljen za sjednicu Gradskog vijeća Grada Sarajeva.

8. **Na 30. sjednici Gradskog vijeća Grada Sarajeva**, održanoj dana 26.06.2023. godine, predsjedavajući Gradskog vijeća Grada Sarajeva uputio je inicijativu sljedećeg sadržaja:

„U skladu s članom 19. Poslovnika Gradskog vijeća, u funkciji gradskog vijećnika, upućujem inicijativu za podršku Grada Sarajeva i Kantona Sarajevo Projektu rehabilitacije i vježbanja u vodi za boračku populaciju, RVI i udruženja logoraša Kantona Sarajevo na Olimpijskom bazenu Otoka, u vrijednosti od 72.000,00 KM, i to tako da:

- Gradonačelnica Grada Sarajeva u Budžetu Grada Sarajeva planira sredstva za sufinansiranje Projekta u visini od 20.000,00 KM, a
- Ministarstvo za boračka pitanja Kantona Sarajevo ovaj projekat sufinansira sa iznosom od 52.000,00 KM.“

OBRAZLOŽENJE:

„Inicijativa je obrazložena u aktu Skupštine JP „Olimpijski bazen Otoka“ doo Sarajevo koji je u prilogu ove inicijative“.

Odgovor:

Gradska služba za obrazovanje, sport, kulturu i mlade je zaprimila, analizirala i uvrstila predloženu inicijativu u planirani rebalans Budžeta Grada Sarajevo za 2023. godinu, u iznosu koji je i predložen gore navedenom inicijativom.

9. **Na 30. sjednici Gradskog vijeća Grada Sarajeva**, održanoj dana 26.07.2023. godine, zamjenica predsjedavajućeg Gradskog vijeća Mirela Džehverović uputila je inicijativu sljedećeg sadržaja:

„Potrebno je da Grad Sarajevo, zajedno sa Kantonom Sarajevo, stipendira najbolje studente na Medicinskom fakultetu Univerziteta u Sarajevu, a da se navedena stipendija nazove po nedavno nastradalim doktoricama Azri Spahić i Almi Suljić“.

Odgovor:

Djelatnost visokog obrazovanja je od posebnog općeg i javnog interesa za Kanton Sarajevo, a Univerzitet u Sarajevu je visokoškolska ustanova od posebnog općeg i javnog interesa za Kanton Sarajevo. Grad Sarajevo, dakle, nema zakonski osnov za stipendiranje studenata, visoko obrazovanje, a nije niti vlastita, niti zajednička nadležnost sa Kantonom Sarajevo koju Grad Sarajevo, shodno Statutu Grada Sarajeva, može obavljati u okviru svog samoupravnog djelokruga.

10. **Na 30. sjednici Gradskog vijeća Grada Sarajeva**, održanoj dana 26.06.2023. godine, gradski vijećnik Muamer Mekić uputio je inicijativu sljedećeg sadržaja:

„Potrebno da gradonačelnica putem nadležnih službi razmotri mogućnost izdvajanja neophodnih finansijskih sredstava iz Budžeta Grada Sarajeva kao pomoć i podršku Hokejaškom savezu Bosne i Hercegovine na ime nabavke sporske ograde za hokejaško igralište, shodno dostavljenom predračunu od strane saveza, a koja bi bila postavljena na ledenoj pisti pored kompleksa Zetra za potrebe održavanja treninga i utakmica reprezentacije i za potrebe Bosanskohercegovačke hokejaške lige.

OBRAZLOŽENJE

„Sredstva koja su im potrebna u ove svrhe iznose približno 50.000,00 KM, a za što bi bili obavezni dostaviti odgovarajuću dokumentaciju po osnovu koje bi se izvršila plaćanja.“

Odgovor:

Gradska služba za obrazovanje, sport, kulturu i mlade je zaprimila, analizirala i realizirala gore navedenu inicijativu u saradnji sa Hokejaškim savezom BiH.

- 11. Na 30. sjednici Gradskog vijeća Grada Sarajeva,** održanoj dana 26.06.2023. godine, upućene su inicijative sljedećeg sadržaja:

„Potrebno je da Grad Sarajevo finansijski podrži Udruženje matematičara koji će ta sredstva iskoristiti u svrhu podučavanja mladih matematičara i učestvovanja na takmičenjima.“

„Potrebno je da Grad Sarajevo nagradi učesnike Matematičke Olimpijade u Japanu, i to: Andreja Krčmara za osvojenu srebrnu medalju, Ervina Macića, Vuka Jankovića, Mirnesa Fehrića i Benjamina Mujkića za osvojene bronzane medalje, kao i Haruna Alibegovića za počasnu pohvalu.“

Odgovor:

Gradska služba za obrazovanje, sport, kulturu i mlade je zaprimila, analizirala i realizirala gore navedene inicijative u saradnji sa Udruženjem matematičara Kantona Sarajevo.

- 12. Na 31. sjednici Gradskog vijeća Grada Sarajeva,** održanoj dana 27.09.2023. godine, predsjedavajući Gradskog vijeća Grada Sarajeva Jasmin Ademović uputio je pitanje/urgenciju vezanu za realizaciju inicijative za sadnju žive ograde duž rijeke Miljacke.

Odgovor:

S tim u vezi, obavještavamo Vas da je nadležna služba prethodno pribavila neophodan projekat holtikulturnog uređenja obale rijeke Miljecke, a u kojem je, između ostalog, definisana i sadnja žive ograde na dionicama prema projektu.

Obzirom da se nabavka i sadanja žive ograde može vršiti samo u određenim periodima godine te da je, također, potrebno planirati znatna finansijska sredstva za nabavku i sadnju, planira se konkretna aktivnost po ovom pitanju na proljeće 2024. godine.

- 13. Na 31. sjednici Gradskog vijeća Grada Sarajeva,** održanoj dana 27.09.2023. godine, Komisije za ljudska prava i slobode uputila je inicijativu sljedećeg sadržaja:

„Komisija za ljudska prava i slobode upućuje inicijativu gradonačelnici da informira Gradsko vijeće sa podacima i trendovima o nasilju u porodici u Sarajevu u periodu od početka pandemije COVID-19 do danas, kao i o tome na osnovu kojih indikatora u ovoj oblasti je Grad Sarajevo intenzivirao aktivnosti i mjere vezane za prevenciju rodnog nasilja i poboljšanje stanja u gradu Sarajevu“.

Odgovor:

Na 31. sjednici Gradskog vijeće Grada Sarajeva, održanoj dana 27.09.2023. godine, kao tačka dnevnog reda razmatrana je Informacija o aktivnostima gradonačelnice grada Sarajeva usmjerenim ka sveobuhvatnoj borbi protiv nasilja sa prijedlogom zaključaka, te je s tim u vezi Gradsko vijeće Grada Sarajeva, u okviru navedene informacije, upoznato sa aktivnostima

vezanim za prevenciju nasilja, kao i mjerama koje će se preduzeti u cilju navedenog. U sklopu navedene informacije nalaze se i zaključci koji su dostavljeni na daljnje postupanje svim nadležnim subjektima, a isti su objavljeni i na službenoj web stranici Grada Sarajeva.

- 14. Na 31. sjednici Gradskog vijeća Grada Sarajeva**, održanoj dana 27.09.2023. godine, gradska vijećnica Amra Zulfikarpašić uputila je inicijativu sljedećeg sadržaja: „Potrebno je da Grad Sarajevo poduzme potrebno da se spomen-obilježje na Trgu djece Sarajeva očisti i redovno održava, jer su navedene aktivnosti u nadležnosti Grada Sarajeva.“

Odgovor:

Grad Sarajevo, u sklopu aktivnosti na održavanju spomenika, vrši redovno čišćenje i održavanje fontane na spomen-obilježju na Trgu djece Sarajeva. Međutim, završetkom projekta Općine Centar na rekonstrukciji šetnice i platoa oko same fontane na Spomen-obilježju ubijenoj djeci opkoljenog Sarajeva 1992.-1995., dodati su novi sadržaji oko same fontane, i to stepenište koje omogućava nesmetano penjanje i hodanje po samom brončanom prstenu fontane, kao i cvjetnjak okolo iste. U praksi sa aspekta održavanja čistoće ovog spomen-obilježja, ovo se pokazalo kao otežavajući faktor, jer neodgovorni građani koji namjerno ostavljaju otpatke imaju lakši pristup samoj fontani, raznosi se zemlja iz cvjetnjaka po brončanom prstenu, te se ubacuje zemlja iz cvjetnjaka u bazen fontane. Također, prilikom izvođenja radova na rekonstrukciji šetnice došlo je do ulaska zemlje u sistem fontane, što je dodatno otežavalo čišćenje i rad same fontane.

Uzimajući u obzir navedeno, nadležna gradska služba je već u cilju rješavanja ovog problema intenzivirala redovno čišćenje fontane, izvršila vanredno čišćenje spomen-obilježja, zamjenu vode u sistemu fontane, kao i ispiranje čitavog hidro-sistema.

Naravno, ostaje problem neodgovornih pojedinaca koji svojom nekulturom i nepoštovanjem simbolike ovog spomen-obilježja narušavaju čistoću i rad ovog značajnog spomenika. Međutim, nadležna gradska služba će još više intenzivirati praćenje čistoće te interventno reagirati ako se za to ukaže potreba.

- 15. Na 31. sjednici Gradskog vijeća Grada Sarajeva**, održanoj dana 27.09.2023. godine, zamjenica predsjedavajućeg Gradskog vijeća Mirela Džehverović uputila je inicijativu sljedećeg sadržaja:

„Potrebno je, što je moguće prije, ne čekajući sljedeću godinu, poduzeti potrebne aktivnosti za čišćenje korita rijeke Miljacke, te informirati Gradsko vijeće koliko je sredstava utrošeno i šta je sve urađeno, do sada, po navedenom pitanju.“

Odgovor:

U vezi sa traženim, informiramo Vas o provedenim aktivnostima i utrošenim sredstvima, kako slijedi:

1. REDOVNO ODRŽAVANJE KORITA RIJEKE MILJACKE

Provedena javna nabavka i sklopljen okvirni sporazum za redovno održavanje korita rijeke Miljacke za 2023. godinu, a sve planirane aktivnosti uspješno su izvršene. Realizirani su sljedeći poslovi:

- Košenje trave sa izgrablivanjem na kosinama regulacije korita rijeke Miljacke: Na dionici od Bentbaše do RTV doma, ukupne površine od 62.800 m² izvršeno je košenje tri puta godišnje, kako je bilo i planirano za ovu godinu;

- Čišćenje korita rijeke Miljacke i odvoz komunalnog otpada. Čišćeno je korito rijeke od smeća i kabastog otpada, a otpad je redovito odvožen 8 puta tokom 2023. godine. Ova usluga obavljena je u skladu s dogovorenim planom;
- Uklanjanje šiblja i niskog rastinja u koritu rijeke Miljacke i potoka Sušice. Na površini od 2.000 m² uspješno je uklonjeno šiblje i nisko rastinje.
- Uklanjanje i odvoz šiblja i niskog rastinja uz kameni zid rijeke na potezu od Drvenije do Skenderije. Na ovom potezu ukupne površine 1.000 m², uklonjeni su šiblje i nisko rastinje i odvezeni dva puta tokom 2023. godine, kako je bilo planirano.

Ugovor za sve navedene usluge uspješno je realiziran, a ukupan iznos ugovora od **99.450,00 KM** sa PDV-om je ispoštovan. Ovim aktivnostima su značajno poboljšani hidrološki i ekološki uslovi korita rijeke Miljacke, pridonoseći čistoći i uređenosti tog područja, te doprinoseći očuvanju okoliša i kvaliteti života u gradu Sarajevu.

2. PJESKARENJE KAMENIH ZIDOVA U KORITU MILJACKE

U sklopu održavanja korita rijeke Miljacke, a u skladu sa Okvirnim Sporazumom o revitalizacija kamenih obalnih zidova korita rijeke Miljacke pjeskarenjem, broj 01/04-11-3423-4/21 od 11.11.2021. godine, zaključenim sa najpovoljnijim ponuđačem „Klico trans gradnja“ d.o.o, ukupne vrijednosti 244.864,20 KM za period od 3 godine, započete su konkretne aktivnosti na ovom važnom projektu.

U 2022. godine ugovoreni su poslovi u vrijednosti od 130.000,00 KM, a u 2023. godini ugovoreni su poslovi pjeskarenja obalnih zidova u vrijednosti od **99.987,62 KM**, te se planira kompletirati dionica između mostova Čumurija i Čobanija sa obje strane Miljacke. Radovi su u završnoj fazi i bit će okončani u roku.

Pjeskarenjem se efikasno uklanja prljavština, masnoće, naslage algi, lišajeva i mahovine nakupljenih tokom vremena, te se obnavlja površina kamena. Na ovaj način revitaliziraju se obalni zidovi u koritu rijeke i dovode u stanje koje dolikuje gradskoj sredini.

3. ČIŠĆENJE RIJEČNOG NANOSA I MULJA IZ KORITA RIJEKE MILJACKE

U okviru zakonske nadležnosti Grada Sarajeva za održavanje uređenih korita na svom području, izrađen je Elaborat o snimanju riječnog nanosa i to za potez uzvodno od brane na Bentbaši do ugostiteljskog objekta Nova Bentbaša i Elaborat o snimanju riječnog nanosa na potezu od brane na Bentbaši do RTV Doma.

S tim u vezi, planirane su aktivnosti čišćenja korita rijeke Miljacke od riječnog nanosa i mulja i to prevashodno na lokaciji uzvodno od brane, na kojoj je Elaboratom utvrđena količina od oko 4.700 m³. Poveden je postupak javne nabavke za uklanjanje nanosa i mulja iz korita na tom potezu, a procijenjena vrijednost radova je bila **120.000,00 KM bez PDV-a**. Međutim, do zaključenja ugovora nije došlo, iz razloga što do danas nije riješeno pitanje lokacije deponije mulja i riječnog nanosa predviđenog za uklanjanje iz korita.

Grad Sarajevo je poduzeo niz aktivnosti na rješavanju prethodnog pitanja određivanja lokacije deponije za privremeno ili trajno odlaganje riječnog nanosa i mulja, sve sa ciljem da se blagovremeno pripremi realizacija ovog važnog projekta.

Tako je, aktom broj: 09-19-699/23 od 25.01.2023. godine, upućen upit KJKP „RAD“ d.o.o Sarajevo, da li postoji mogućnosti da to preduzeće preuzima riječni materijal iz korita za potrebe prekrivke ili druge potrebe, a KJKP „RAD“ d.o.o. je, dopisom broj: 01-01-07-6105/23 od 23.03.2023. godine, dostavio izjašnjenje kojim nije dat eksplicitan odgovor.

U nastojanju rješavanja pitanja lokacije za deponovanje, dana 25.07.2023. godine održan je sastanak sa predstavnicima kantonalnog Ministarstva privrede Kantona Sarajevo, Kantonalne uprave civilne zaštite, Zavoda za izgradnju Kantona Sarajeva i Općine Stari Grad. Na sastanku je ocijenjeno da bi bilo najbolje da se izvađeni materijal iskoristi za potrebe civilne zaštite, primarno za zaštitu od poplava na poplavnim područjima, te da je nužno u najkraćem roku odrediti mjesto za odlaganje materijala i u tom smislu doneseni su zaključci kojim je dogovoreno da će resorno Ministarstvo privrede u saradnji sa Kantonalnom upravom civilne zaštite definirati lokaciju/lokacije za deponovanje materijala koje će koristiti Kantonalna uprava civilne zaštite, te da će o tome obavijestiti Gradsku upravu. (*Zapisnik sa sastanka uz dopis broj: 09-11-4698-2/23 od 27.07.2023. godine u prilogu*). Po citiranom zapisniku nije postupljeno.

Zatim je, dopisom broj: 09-11-5689-1/23 od 25.07.2023. godine, zatraženo od Općine Stari Grad, na čijem području bi se izvodili radovi, da odrede lokaciju za deponovanje pa je zajedničkim obilaskom terena utvrđena potencijalna lokacija na desnoj obali rijeke Miljacke uzvodno, što je i potvrđeno u odgovoru Općine Stari Grad, broj: 13/1-19-5540/23 od 02.08.2023. godine, u kojem je naznačeno da se predmetni lokalitet nalazi u obuhvatu Zaštićenog pejzaža „Bentbaša”, te da je potrebno pribaviti stručno mišljenje Kantonalnog Zavoda za zaštitu prirodnog i kulturno-historijskog naslijeđa Sarajevo, što je i učinjeno dopisom broj: 09-11-4689-3/23 od 09.08.2023. godine. U stručnom mišljenju Zavoda, broj: 1227/23-Z-16 od 15.08.2023. godine, navedeno je da odlaganje materijala na predmetnom lokalitetu nije prihvatljivo sa aspekta zaštite prirodnog i kulturno-historijskog naslijeđa.

Nadalje je aktom Grada Sarajeva od 04.09.2023. godine upućena molba općinama Novo Sarajevo, Novi Grad i Ilidža, za određivanje lokacije za deponovanje riječnog materijala iz korita rijeke Miljacke, na koji smo zaprimili odgovor samo od Općine Ilidža, broj: 02-19-6353/23 od 08.09.2023. godine, da nisu u mogućnosti ponuditi lokaciju za odlaganje riječnog materijala.

Konačno je dopisom broj: 09-11-6405/23 od 22.09.2023. godine dostavljen upit Ministarstvu komunalne privrede, infrastrukture, prostornog uređenja, građenja i zaštite okoline Kantona Sarajevo, da li se materijal iz rijeke može smatrati negrađevinskim otpadom pa da se kroz ugovor naloži izvođaču radova da isti odveze na deponiju, na koji smo dobili odgovor aktom broj: 05-21-41529/23 od 02.10.2023. godine, da navedena vrsta otpada **ne može biti odložena na deponiju „Smiljevići” Sarajevo.**

Elaboratom o snimanju riječnog nanosa u koritu rijeke Miljacke na dionici nizvodno od brane sve do RTV Doma, odnosno na cijeloj dužini uređenog korita, utvrđena je količina od preko 10.000 m³ riječnog nanosa, a planirano je da se sukcesivno u narednim fazama vrši uklanjanje istog, prema raspoloživim budžetskim sredstvima. Shodno tome, planirano je da se u tekućoj godini također započne sa čišćenjem korita od riječnog nanosa od brane nizvodno, tako da se ukloni cca 3.600 m³ riječnog nanosa, ali zbog navedenog neriješenog pitanja deponovanja navedenog materijala, nismo mogli realizirati ovu aktivnost.

Kako je iz navedenog vidljivo da smo iscrpili sve mogućnosti za rješavanje prethodnog pitanja određivanja lokacije deponije za privremeno ili trajno odlaganje riječnog nanosa i mulja, to proizlazi da nismo u mogućnosti realizirati planiranu aktivnost.

U prilogu dostavljamo kopiju korespondencije navedene pod tačkom 3. ove Informacije.

16. Na 31. sjednici Gradskog vijeća Grada Sarajeva, održanoj dana 27.09.2023. godine, gradski vijećnik Vedad Deljković uputio je vijećničku inicijativu sljedećeg sadržaja:

„Potrebno je da gradonačelnica Grada Sarajeva, shodno objektivnim mogućnostima Grada Sarajeva, razmotri mogućnost izdvajanja određenog iznosa finansijskih sredstava iz Budžeta Grada Sarajeva na ime rekonstrukcije dječjeg igrališta Safet beg Bašagić (područje MZ Medrese), Općina Stari Grad Sarajevo.“

OBRAZLOŽENJE

Upoznat sam sa činjenicom da građani područja MZ Medrese, Općina Stari Grad Sarajevo, već duži vremenski period ukazuju na potrebu rekonstrukcije dječjeg igrališta Safet beg Bašagić. U svakodnevnim kontaktima sa stanovnicima ovog područja saznao sam da za naprijed navedenim postoji realna potreba, prevashodno iz razloga što na ovom području ne postoji slično igralište koje bi zadovoljilo potrebe naše najmlađe populacije o kojoj je Grad Sarajevo uvijek vodio računa, a što ne bi trebao biti izuzetak ni u ovom slučaju.

Odgovor:

Grad Sarajevo će razmotriti mogućnost realizacije ove inicijative te će shodno finansijskim mogućnostima planirati sredstva u Budžetu Grada Sarajeva za 2024. godinu u cilju rekonstrukcije dječjeg igrališta Safet beg Bašagić (područje MZ Medrese).

17. Predsjedavajući Gradskog vijeća Grada Sarajeva Jasmin Ademović, u skladu sa članom 19. Poslovnika Gradskog vijeća, a u funkciji gradskog vijećnika, uputio je inicijativu kako slijedi:

„Potrebno je da gradonačelnica Grada Sarajeva pripremi poseban program za obilježavanje 25. novembra, koji se neće sastojati samo od centralnog događaja – Svečane akademije, već i od bogatog kulturno-umjetničkog programa obilježavanja. Neophodno je da kao glavni grad Bosne i Hercegovine damo veći značaj ovom velikom datumu kojim se obilježava obnova državnosti BiH, a posebno uzimajući u obzir da se ove godine obilježava 80. godišnjica prvog zasjedanja ZAVNOBIH-a“.

Odgovori:

Povodom obilježavanja 25. novembra – Dana državnosti Bosne i Hercegovine, pored Svečane akademije, Grad Sarajevo je organizirao ili sudjelovao u sljedećim aktivnostima:

Izložba „Historijske refleksije: Plakat kao medij uspostavljanja društvenog i političkog poretka“, 20.12.2023. godine

Grad Sarajevo je podržao održavanje izložbe „Historijske refleksije: Plakat kao medij uspostavljanja društvenog i političkog poretka“ koja je u organizaciji Fakulteta političkih nauka Univerziteta u Sarajevu održana u holu Fakulteta političkih nauka 20.12.2023. godine. Ovom izložbom otvorena je trosedmična Međunarodna konferencija „ZAVNOBIH i AVNOJ 80 godina poslije – Historijske refleksije i savremeno razumijevanje“, koja je također u organizaciji Fakulteta političkih nauka Univerziteta u Sarajevu, održana tokom novembra i decembra 2023. godine.

Svečani koncert „Sazvučja“, 24.11.2023. godine

Svečani koncert „Sazvučja“ u izvedbi orkestra Camerata Academica i pod dirigentskom palicom Tijane Vignjević, održan je pod pokroviteljstvom Grada Sarajeva i Kantona Sarajevo u Vijećnici 24.11.2023. godine.

Ovaj koncert je imao poseban značaj jer je okupio Bošnjačku zajednicu kulture „Preporod“, Hrvatsko kulturno društvo „Napredak“, Srpsko prosvjetno i kulturno društvo „Prosvjeta“ i Jevrejsko kulturno-prosvjetno i humanitarno društvo „La Benevolencija“, kao temeljne organizacije kulture naroda BiH, s tradicijom dužom od 120 godina.

Učešće mladih na polaganju cvijeća, 25.11.2023. godine

Grad Sarajevo je koordinirao prisustvo učenika 8. i 9. razreda osnovnih škola sa područja četiri gradske općine na polaganju cvijeća na Spomen-obilježju ubijenoj djeci opkoljenog Sarajeva, 25.11.2023. godine.

Također, održan je svečani defile mladih stipendista Grada Sarajeva od Spomen-obilježja ubijenoj djeci opkoljenog Sarajeva do Vijećnice.

Iluminacija Vijećnice, 25.11.2023. godine

Povodom obilježavanja 25. novembra – Dana državnosti Bosne i Hercegovine, Vijećnica je bila osvijetljena bojama zastave Bosne i Hercegovine.

- 18. Na 49. sjednici Komisije za međunarodnu saradnju Gradskog vijeća Grada Sarajeva, održanoj dana 05.09.2023. godine, Komisija za međunarodnu saradnju uputila je inicijativu sljedećeg sadržaja:**

„Komisija za međunarodnu saradnju Gradskog vijeća Grada Sarajeva upućuje inicijativu gradonačelnici da razmotri mogućnost formalizacije saradnje sa:

- talijanskim gradom Rogno koji je već iskazao pijetet žrtvama Srebrenice određenim manifestacijama i
- norveškim gradom Lillehammerom u kojem je aktivna velika zajednica bh. dijaspore.

2. Komisija upućuje inicijativu putem Gradskog vijeća gradonačelnici da informira Gradsko vijeće o mogućnostima saradnje Grada Sarajeva sa privrednim subjektima, a u smislu pristupa IPA fondovima za prekograničnu saradnju, koristeći postojeće sporazume koje ima s pobratimskim i prijateljskim gradovima“.

Odgovori:

1. Na osnovu inicijative Gradskog vijeća, 01.12.2023. godine uputili smo dopis načelniku općine Rogno Cristianu Molinariju i dobili odgovor od Mirsada Starčevića, predsjednika udruženja „Ljiljan“, koje okuplja građane BiH porijekla koji žive na području regija Bergamo i Brescia. Općina Rogno je jedna od pet talijanskih općina koja ima potpisane sporazume o saradnji s općinama Zavidovići, Tešanj i Maglaj u oblasti sporta, kulture, turizma i ekonomije. U maju 2024. godine planirano je gostovanje folklornih društava iz BiH u talijanskim općinama, te je upućen poziv od strane udruženja „Ljiljan“ gradonačelnici da u navedenom periodu posjeti Rogno. Predsjednik udruženja „Ljiljan“ održat će sastanak sa zamjenicom gradonačelnice Anjom Margetić Stakić 29.12.2023. godine na kojem će predstaviti sadržaj sporazuma o saradnji s navedenim talijanskim općinama.
 - Također, 01.12.2023.godine upućen je dopis gradonačelniku Grada Lillehammera Hansu Olavu Sundforu sa željom za uspostavom saradnje sa Gradom Sarajevom u oblasti ekonomije, sporta, kulture i turizma. Do današnjeg dana nismo dobili odgovor.
2. Grad Sarajevo je inicijator i koordinator Regionalne mreže projektnih timova CITNET koja povezuje timove iz gradova i općina sa ciljem zajedničkog povlačenja sredstava iz fondova.

Trenutno Mrežu čini 11 gradova iz 6 država regiona, a otvorena je i za druge da se priključe istoj.

Svaki grad ili općina ima saradnju sa privrednim sektorom u svojoj zajednici te procjenjuje od projekta do projekta kako da uključi taj sektor. Veza između privrede i uprave je neophodna, ali se također mora pažljivo graditi na pravim principima. U okviru Net Zero projekta napravljena je Entreprise Allience koja upravo okuplja kompanije iz privatnog sektora koje na svoj način daju doprinos Net Zero Misiji. Ovaj model okupljanja privrednika oko određene teme, također, se pokazao uspješnim. Što se tiče udruživanja privrednika oko teme međunarodnih fondova, privredne komore dosta dobro vode ove aktivnosti i najrelevantnije su kada je riječ o privrednoj saradnji.

19. Na 45. sjednici Kolegija Gradskog vijeća Grada Sarajeva, održanoj dana 25.09.2023. godine, član Kolegija Seid Škaljić postavio je pitanje, broj: 01-GV-02-1349-1.3/23 od 25.09.2023. godine, sljedećeg sadržaja:

„Na koji način je Gradska uprava donijela odluku o partnerstvu sa Intesa Sanpaolo Bankom BiH i M-BIKE shopom za subvencioniranje 73 građanina sa 100,00 KM za kupovinu bicikla s ciljem promocije biciklizma kao održivog načina mobilnosti?“

Odgovor:

Grad Sarajevo je 2020. godine usvojio Plan održive urbane mobilnosti – SUMP (Sustainable Urban Mobility Plan) i time se obavezao na njegovu implementaciju.

Ove godine je, u okviru organizacije obilježavanja Evropske sedmice mobilnosti, odlučeno da se, kao jedna od mjera iz SUMP-a, implementira i aktivnost subvencioniranja kupovine bicikala po uzoru na druge gradove gdje se ova aktivnost pokazala uspješnom i korisnom. Za tu svrhu je planiran iznos od 4.000 KM sa stavke u Budžetu Grada Sarajeva za 2023. godinu pod nazivom „Implementacija mjera Plana održive urbane mobilnosti.“

Na poziv za subvencioniranje kupovine bicikala pristigle su ukupno 1.494 prijave, što pokazuje zainteresovanost i potrebu građana za ovakvim vidom podrške.

Za potrebe provođenja ove aktivnosti urađeno je istraživanje tržišta, proveden je postupak javne nabavke, te izabran MBike Shop kao ponuđač sa najkvalitetnijom i najobuhvatnijom ponudom, te opcijom realizacije ovakve aktivnosti putem dodjele vaučera.

Intessa San Paolo banka iskazala je interes da učestvuje u aktivnostima u okviru Evropske sedmice mobilnosti, te su tražili informaciju o aktivnostima koje Grad organizira ovim povodom. Kada smo ih informirali o svim aktivnostima, uključujući i subvencioniranja kupovine bicikala, izrazili su želju da budu sponzori ove aktivnosti sa iznosom od 3.000,00 KM, te na taj način omogućće većem broju građana korištenje ovakve pogodnosti. Obzirom da je u pitanju društveno korisna aktivnost koja je u potpunosti usmjerena prema građanima, sponzorstvo je prihvaćeno. Zaposlenici Intessa banke su uzeli učešće i u drugim aktivnostima u okviru Evropske sedmice mobilnosti, kao što je kampanja Bike2work.

Naknadno je i UNIQA osiguranje odlučila da podrži aktivnost subvencioniranja kupovine bicikala, sponzorstvom u iznosu 3.000 KM, zatim MBike Shop sa iznosom od 5.000 KM, te EU Info Centar sa iznosom od 300 KM. Na kraju je, umjesto planiranih 40 vaučera po 100 KM, koliko je Grad mogao da obezbijedi iz Budžeta Grada Sarajeva, ukupno

obezbijedeno **153 vaučera za građane**, ukupne vrijednosti 15.300 KM. Time smo građanima zajednički olakšali kupovinu bicikla, te ih potakli na korištenje bicikla kao zdravog i održivog načina prijevoza.

20. Na 32. sjednici Gradskog vijeća Grada Sarajeva, održanoj dana 25.10.2023. godine, gradska vijećnica Danijela Šahat uputila je inicijativu sljedećeg sadržaja:

„Da se nabavi neophodna oprema (digitalni logopedski set Behringer, logopedski set vibrafon, logopedske sonde, interaktivni panel, happy senzo sprej, didaktički materijal...) za rad dva logopedska kabineta u AMBULANTI HRASNO BRDO“.

Odgovor:

U Budžetu Grada Sarajeva za 2023. godinu („Službene novine Kantona Sarajevo“, br. 2/23 i 46/23) nisu planirana sredstva za realizaciju navedene inicijative.

21. Na 32. sjednici Gradskog vijeća Grada Sarajeva, održanoj dana 25.10.2023. godine, gradski vijećnik Alen Girt uputio je vijećničko pitanje sljedećeg sadržaja:

„Potrebno je da se dostavi informacija zašto nije otvoren te stavljen u funkciju muzej Vlater brani Sarajevo koji postoji u Bistričkoj stanici“?

Odgovor:

Muzej Valter brani Sarajevo je dat na upravljanje JU „Gradski muzeji“ Sarajevo, te je Vaše pitanje proslijeđeno navedenoj ustanovi. Po zaprimanju odgovora, isti će Vam biti dostavljen.

22. Na 32. sjednici Gradskog vijeća Grada Sarajeva, održanoj dana 25.10.2023. godine, gradska vijećnica Danijela Šahat uputila je inicijativu sljedećeg sadržaja:

„Da se izvrši farbanje biciklističke staze na Vilsonovom šetalištu“.

Odgovor:

Gradska služba za ubrano planiranje, investicijske, stambene i komunalne poslove je u prijedlogu Budžetu Grada Sarajeva za 2024. godinu predvidjela sredstva za održavanje biciklističkih staza, a što podrazumijeva obnavljanje saobraćajne signalizacije, farbanje biciklističke staze u ulici Vilsonovo šetalište sa popravkom „vibro trake“. Po usvajanju Budžeta za 2024. godinu, izvršit će se pokretanje procedure javne nabavke, kako bi se sa sticanjem povoljnih vremenskih uslova moglo započeti na ovim radovima.

23. Na 32. sjednici Gradskog vijeća Grada Sarajeva, održanoj dana 25.10.2023. godine, gradski vijećnik Srđan Srdić uputio je više Inicijativa vezanih za izgradnju biciklističke staze u ulici Aleja Lipa, i to:

- „Potrebno je dostaviti suglasnost Ministarstva saobraćaja KS broj 04-27-5168/17 od 20.04.2017. godine, navedenoj pod tačkom 11. u odobrenju za građenje, a vezano za izgradnju biciklističke staze u ul. Aleja Lipa“. Broj Inicijative: 01-GV-02-1604-2/23.
- „Potrebno je dostaviti imena projekatata ili firme a vezano za izgradnju biciklističke staze u ulici Aleja Lipa“. Broj Inicijative: 01-GV-02-1604-3/23.
- „Kojim standardima se vodili pri projektovanju biciklističke staze u ulici Aleja Lipa, jer u zemljama gdje su razvijene biciklističke kulture, biciklističke staze ne izgledaju ovako i ne praktikuje se na ovaj način“. Broj Inicijative: 01-GV-02-1604-6/23.

- „Tražim da se zaustave radovi na izgradnji biciklističke staze na dionici u ulici Aleja Lipa dok se ne utvrdi činjenično stanje, kada je izdata urbanistička i građevinska dozvola, do kada važe dozvole i jesu li istekle? Broj Inicijative: 01-GV-02-1604-7/23.
- „Da li ste upoznati da se na državnom nivou uskoro treba usvojiti zakon, uredba o biciklističkim stazama i zašto nije sačekano da se ista usvoji? Bio sam sa građanima iz ulice Aleja Lipa i moram prenijeti da građani uopće nisu zadovoljni izgradnjom ovog dijela biciklističke staze“. Broj Inicijative: 01-GV-02-1604-7/23.
- „Potrebno je dostaviti kompletan projekat koji se tiče izrade biciklističke staze u ulici Aleja Lipa, projekat 08-23-1051, ovjeren 21.08.2019. godine. Broj Inicijative: 01-GV-02-1604-1/23.

Odgovor:

U priloženom odgovoru pružamo sveobuhvatne informacije u vezi s navedenim inicijativama: Grad Sarajevo je dobio Odobrenje za izvođenje radova na biciklističkoj stazi Nedžarići-Skenderija, kao i pješačkim stazama uz nju u dijelu od VI do III transverzale na području općine Novo Sarajevo. Ovo odobrenje proizlazi iz detaljnog Glavnog projekta biciklističke staze, koji je izradilo Arhitektonski fakultet u Sarajevu, Institut za arhitekturu, urbanizam i prostorno planiranje. Također, isti projekt je dobio saglasnost Ministarstva saobraćaja Kantona Sarajevo.

Važno je napomenuti da je projektiranje biciklističke staze usklađeno s dokumentom „SMJERNICE ZA PROJEKTOVANJE, GRAĐENJE, ODRŽAVANJE I NADZOR NA PUTEVIMA“, „KNJIGA I: PROJEKTOVANJE“, „DIO 1: PROJEKTOVANJE PUTEVA“, „Poglavlje 4: FUNKCIONALNI ELEMENTI I POVRŠINE PUTA“ iz 2005. godine.

Što se tiče zaustavljanja radova, želimo Vas obavijestiti da je inspekcijski nadzor nad izgradnjom biciklističke staze proveden sredinom oktobra 2023. godine. Građevinski inspektor Općine Novo Sarajevo nije imao primjedbi na gradilišnu dokumentaciju ili izvođača radova, Bosman d.o.o.

Trenutno nismo upoznati s najnovijim događanjima na državnom nivou vezanim uz predstojeći zakon ili uredbu o biciklističkim stazama. Ipak, imamo povjerenje da je Općina Novo Sarajevo izdala Odobrenje za građenje u skladu s važećim zakonskim propisima i uredbama.

Nažalost, Gradska služba za urbano planiranje, investicije, stambene i komunalne poslove trenutno nema u posjedu ovjeren primjerak projekta. Ovjereni primjerci nalaze se kod izvođača radova Bosman d.o.o. i u službi za urbanizam Općine Novo Sarajevo.

Ukoliko imate dodatna pitanja ili zahtjeve za dodatnim informacijama, slobodno nam se obratite.

- 24. Na 33. sjednici Gradskog vijeća Grada Sarajeva, održanoj dana 29.11.2023. godine, gradski vijećnik Samir Bejić uputio je inicijativu da gradonačelnica putem nadležnih službi razmotri mogućnost izdvajanja finansijskih sredstava iz Budžeta Grada Sarajeva za podršku Udruženju za sportsku i ekološko historijsku edukaciju mladih „Healthy Future“.**

Odgovor:

Gradska služba za obrazovanje, sport, kulturu i mlade je zaprimila, analizirala i realizirala gore navedenu inicijativu kroz izdvajanje sredstava iz Budžeta Grada Sarajeva za 2023. godinu za Udruženje za sportsku i ekološko historijsku edukaciju mladih „Healthy Future“. Sredstva će biti namjenjena za nabavku sportske opreme i rekvizita i pokrivanje troškova sale za treninge.

Pregled odgovora na vijećnička pitanja i inicijative koje su upućene na ranijim sjednicama Gradskog vijeća Grada Sarajeva, a čiji su odgovori pristigli u toku sačinjavanja informacije, kako slijedi:

- 1. Na 26. sjednici Gradskog vijeća Grada Sarajeva**, održanoj dana 29.03.2023. godine, gradski vijećnik Jasmin Skorupan uputio je inicijativu da Grad Sarajevo, u saradnji sa Kantonom Sarajevo, poduzme potrebne mjere i aktivnosti da se izgradi zvučna barijera sa kamenom vunom duž južne longitudinalne ceste i prve transverzale u sarajevskom naselju Šip.

Odgovor:

U vezi sa prethodno navedenim, u prilogu Vam dostavljamo odgovor Direkcije za puteve Kantona Sarajevo na predmetnu inicijativu.

- 2. Na 26. sjednici Gradskog vijeća Grada Sarajeva**, održanoj dana 29.03.2023 godine, gradska vijećnica Biljana Lazarević uputila je vijećničku inicijativu sljedećeg sadržaja:
„U izvještaju o ostvarivanju politike Grada Sarajeva i aktivnostima gradonačelnice Grada Sarajeva za period 01.01.-31.12.2022 godine je, između ostalo, navedeno da je Gradska služba za internu reviziju, u izvještajnom periodu, uradila osam internih revizija. S tim u vezi, potrebno je dostaviti izvještaje interne revizije za „Strateško planiranje i budžetiranje“ i interne revizije „Javne nabavke“.

Odgovor:

U vezi sa Vašom inicijativom za dostavom revizorskih izvještaja gradske službe za internu reviziju upoznajem Vas sa sljedećim:

Zakonom o internoj reviziji u javnom sektoru u Federaciji Bosne i Hercegovine („Službene novine FBiH“, br. 47/08 i 101/16) te Metodologijom rada interne revizije u javnom sektoru u FBiH („Službene novine FBiH“, br. 13/12, 93/13, 93/15 i 20/23), a koja je propisana Zakonom o internoj reviziji u javnom sektoru u FBiH, propisan je način distribucije revizorskih izvještaja interne revizije.

Članom 14. Zakona o internoj reviziji u javnom sektoru u FBiH te Metodologijom rada interne revizije u javnom sektoru u FBiH u dijelu 6 i 7.3.3. propisano je da se konačni revizorski izvještaji dostavljaju rukovodiocu organizacije te rukovodiocu organizacione jedinice koja je bila predmet revizije

Izvještavanje ostalih zainteresiranih strana je definirano članovima 17. i 18. Zakona o internoj reviziji u javnom sektoru u FBiH koji predviđaju dostavljanje izvještaja o naknadnom pregledu provedbe preporuka te godišnjeg izvještaja o radu interne revizije organima sudske, zakonodavne i izvršne vlasti te Uredu za reviziju institucija u FBiH na njihov zahtjev.

Uzimajući u obzir sve navedeno, obavještavamo Vas da dostava traženih revizorskih izvještaja nije moguća, a iz objektivnih razloga koji proističu iz zakonskih ograničenja.

- 3. Na 26. sjednici Gradskog vijeća Grada Sarajeva**, održanoj dana 29.03.2023. godine, gradska vijećnica Biljana Lazarević uputila je vijećničko pitanje sljedećeg sadržaja:

„Kada se može očekivati izmjena Odluke o utvrđivanju i načinu sufinansiranja kulturnih manifestacija od posebnog interesa za Grad Sarajevo, u dijelu u kojem se utvrđuju kulturne

manifestacije od posebnog interesa za Grad Sarajevo, a u skladu sa zaključkom usvojenim na 15. sjednici Gradskog vijeća“?

Odgovor:

Gradska služba za obrazovanje, sport, kulturu i mlade razmatrala je pristiglo vijećničko pitanje te će u narednom periodu pristupiti izmjeni Odluke o utvrđivanju i načinu sufinansiranja kulturnih manifestacija od posebnog interesa za Grad Sarajevo („Službene novine Kantona Sarajevo“, broj 10/19). Prilikom izrade izmjene Odluke, naročito će se obratiti pažnja u dijelu u kojem se utvrđuju kulturne manifestacije od posebnog interesa za Grad Sarajevo.

4. Na 26. sjednici Gradskog vijeća Grada Sarajeva, održanoj dana 29.03.2023. godine, gradski vijećnik Toni Vukadin uputio je vijećničko pitanje sljedećeg sadržaja:

„Koji je status projekta vodovodne mreže u SOS Dječjem selu na Mojmilu, a koji sufinansira Grada Sarajevo?“

Budući da je u Budžetu Grada Sarajeva izdvojeno 30.000,00 KM za ovaj projekat, a poznato je da projekat nije realiziran, potrebno je da Grad Sarajevo inicira aktivnosti kako bi se projekat što prije realizirao i smanjili troškovi koji nastaju zbog velikog gubitka vode, a koje plaća SOS Dječje selo.

Odgovor:

U prilogu ovog akta dostavljamo odgovor Općine Novi Grad, broj: 02/08-19-541/23 SMS od 11.07.2023. godine, a koji se odnosi na status projekta vodovodne mreže u SOS Dječjem selu na Mojmilu.

5. Na 26. sjednici Gradskog vijeća Grada Sarajeva, održanoj dana 29.03.2023. godine, gradski vijećnik Toni Vukadin uputio je inicijativu sljedećeg sadržaja:

„Potrebno je da Grad Sarajevo razmotri mogućnost nabavke manjeg vozila za potrebe inspekcije Grada Sarajeva“.

Odgovor: Budžetom Grada Sarajeva za 2023. godinu nisu planirala sredstava za nabavku motornog vozila za potrebe inspekcije Grada Sarajeva.

6. Na 27. sjednici Gradskog vijeća Grada Sarajeva, održanoj dana 26.04.2023. godine, gradski vijećnik Adi Škaljić uputio je vijećničku inicijativu sljedećeg sadržaja:

„Na osnovu člana 19. Poslovnika Gradskog vijeća Grada Sarajeva, koji potpisuje pravo vijećnika da podnosi inicijative, upućujem vijećničku inicijativu za razmatranje pretvaranja jednog od prolaza kroz zgradu „Loris“ u spomen-obilježje (mini muzej) ratnoj historiji ove zgrade.“

OBRAZLOŽENJE

Nakon projekcije dokumentarnog filma „Simbol otpora – zgrada Loris“, stanari ove legendarne zgrade došli su na ideju da se jedan od prolaza uredi i posveti ratnoj historiji ove zgrade, ljudima koji su je branili i onima koji su u najtežem periodu u njoj živjeli.

Smatram da bi Grad Sarajevo trebao biti pokretač aktivnosti, a u realizaciju se može uključiti JU Muzej Grada Sarajeva.

Odgovor:

Grad Sarajevo će razmotriti mogućnost realizacije ove inicijative te će nadležnim institucijama uputiti akt kojim će tražiti saglasnosti, kao i saradnju u projektu.

7. Na 27. sjednici Gradskog vijeća Grada Sarajeva, održanoj dana 26.04.2023. godine, gradski vijećnik Adi Škaljić, uputio je inicijativu, broj: 01-GV-02-654/23 od 24.04.2023. godine, kojim se traži 10.000,00 KM za finansiranje obnove prostorije KJU Gerontološki centar Sarajevo za potrebe izgradnje čitaonice. Čitaonicu će koristiti korisnici usluga Gerontološkog centra.

Odgovor:

U Budžetu Grada Sarajeva za 2023. godinu nisu planirana sredstva za ovu namjenu.

8. Na 27. sjednici Gradskog vijeća Grada Sarajeva, održanoj dana 26.04.2023. godine, gradski vijećnik Muamer Mekić uputio je inicijativu sljedećeg sadržaja:

„Da Grad Sarajevo u skladu sa svojim finansijskim mogućnostima pomogne odlazak naše Futsal Reprezentacije gluhtonijemih i nagluhih lica na Svjetsko prvenstvo u Brazilu u novembru ove godine.”

Objasnenje:

„Naša futsal reprezentacija gluhtonijemih i nagluhih lica plasirala se na Svjetsko prvenstvo u Futsalu koje se ove godine održava u Brazilu u novembru 2023. godine. S obzirom na troškove učešća, a i obaveze senzibiliteta kada je ova populacija u pitanju, molim Gradsko vijeće da se očituje o ovoj inicijativi, odnosno istu podrži i sa svojim finansijskim mogućnostima kao Grad Sarajevo pomognemo odlazak naših fudbalera. U proteklom periodu Grad Sarajevo je finansijski pomogao kako odlazak naše ženske Košarkaške reprezentacije na Svjetsko prvenstvo, kao i potpomogao vrhunski sport i rezultate Lane Pudar, ne vidim prepreke i razlog da na simboličan način i u skladu sa mogućnostima pomognemo i našoj Reprezentaciji gluhih i nagluhih lica da učestvuju na najvećoj svjetskoj smotri na koju su se plasirali.“

Odgovor:

Budžetom Grada Sarajeva za 2023. godinu planirana je pozicija namijenjena za podršku sportskim udruženjima/klubovima u visini od 120.000 KM koja će se realizirati putem javnog poziva. Sportski savez gluhih i nagluhih osoba treba da aplicira na javni poziv te uz ispunjavanje kriterija može ravnopravno očekivati podršku sa drugim sportskim udruženjima/klubovima.

9. Na 27. sjednici Gradskog vijeća Grada Sarajeva, održanoj dana 26.04.2023. godine, gradski vijećnik Samir Bejić uputio je inicijativu, broj: 01-GV-02-664-2/23 od 26.04.2023. godine, kojom se traži 10.000,00 KM za finansiranje projekta Udruženja „Majka i dijete – BOMBON” – priručnika „Prvi dani sa bebom”. Priručnik će koristiti budući mladi roditelji.

Odgovor:

Izmjenama i dopunama Budžeta Grada Sarajeva za 2022. godinu („Službene novine Kantona Sarajevo“, broj 49/22), Grad Sarajevo je doznačio sredstva Udruženju „Majka i dijete – BOMBON, u iznosu od 5.000,00 KM u svrhu edukacije za buduće mlade roditelje,

finansiranje stručnih osoba/predavača, te izdavanje publikacije „Prvi dani s bebom kući” – priručnika za buduće roditelje.

Dana 17.03.2023. godine održan je događaj na kojem je predstavljen istoimeni priručnik. Navedenom događaju prisustvovala je i predstavnica Grada Sarajeva.

10. Na 27. sjednici Gradskog vijeća Grada Sarajeva, održanoj dana 26.04.2023. godine, gradski vijećnik Samir Bejić uputio je inicijativu sljedećeg sadržaja:

„Da Grad Sarajevo Udruženju za sportsku i ekološko-historijsku edukaciju mladih „Healthy Future“, u čijem je sastavu i Škola fudbala Kick Off, koje je osnovano 19.12.2022. godine sa sjedištem na Kantonu Sarajevo, pomogne sa 5 hiljada KM. Ranije je od aprila 2020. godine Udruženje funkcionisalo pod samim nazivom Kick Off, ali je ponovnim obnavljanjem i potrebom za proširenje djelatnosti formirano udruženje Healthy Future, u čijem sastavu i danas djeluje sa radom Škola fudbala Kick Off koja danas broji oko 100 dječaka i djevojčica u generacijama od 2011. do 2018. godišta. Udruženje je ove godine dobilo poziv da u generaciji 2014./2015. godišta učestvuje na Međunarodnom memorijalnom turniru „Dragan Mance Cup“, a koje će se održati u periodu od 16 do 18.06.2023. godine u Beogradu. To bi predstavljalo veliku čast za dječake i djevojčice iz naše škole fudbala da učestvuju na tom međunarodnom turniru na kojem su svoje učešće potvrdili veliki klubovi kao što su Benfica (Portugal), Paok (Grčka), Modena (Italija), Ujpešt (Mađarska), Crvena Zvezda, Partizan, Vojvodina (Srbija), kao i mnogi dugi klubovi iz zemalja regiona i šire.

Udruženje za sportsku i ekološko historijsku edukaciju mladih Healthy Future bavi se promocijom države Bosne i Hercegovine kroz ekološke radionice, kao i očuvanje kulture sjećanja na historijski put koji je naša država prošla.

Predsjednik udruženja je Mustafa Hodžić, maloljetni borac Armije BiH, ratni vojni invalid koji je do sada 96 puta nesebično darivao krv i krvne derivate na transfuziologiji u Sarajevu. Do kraja godine očekujemo rekordni stoti put i u vezi s tim smatram da Mustafa Hodžić zaslužuje podršku Grada Sarajevo“

Odgovor:

Budžetom Grada Sarajeva za 2023. godinu planirana je pozicija namijenjena za podršku sportskim udruženjima/klubovima u visini 120.000 KM koja će se realizirati putem javnog poziva. Udruženje za sportsku i ekološko historijsku edukaciju mladih Healthy Future treba da aplicira na javni poziv te uz ispunjavanje kriterija može ravnopravno očekivati podršku sa drugim klubovima.

11. Na 27. sjednici Gradskog vijeća Grada Sarajeva, održanoj dana 26.04.2023. godine, gradski vijećnik Vedad Deljković uputio je inicijativu broj: 01-GV-02-615/23 od 17.04.2023. godine. Inicijativom se traži 3.864,80 KM za nabavku kuhinjskih aparata za objekat u selu Ledeći. Objekat će koristiti štićenici Kantonalne javne ustanove „Dom za djecu bez roditeljskog staranja” (Dom Bjelave).

Gradsko vijeće Grada Sarajeva podržalo je ovu inicijativu te je ona postala inicijativom Gradskog vijeća.

Odgovor:

Dana 10.04.2023. godine gradonačelnica Sarajeva Benjamina Karić održala je sastanak sa mladim poduzetnicima Tarikom i Mirnesom Fatićem koji se bave prodajom bijele tehnike u Hadžićima. Izrazili su spremnost da daruju dio svog prodajnog asortimana. Gradonačelnica

je predložila da se opremi vikend kuća koju će koristiti djeca bez roditeljskog staranja iz Doma Bjelave. Deset dana kasnije darovnica je realizirana u cijelosti. Na taj način je realizirana i ova inicijativa.

12. Gradsko vijeće Grada Sarajeva, na 27. sjednici održanoj dana 26.04.2023. godine, usvojilo je inicijativu zamjenika predsjedavajućeg Gradskog Vijeća Dragana Stevanovića kao inicijativu Gradskog vijeća, a koja glasi:

„Upućujem inicijativu gradonačelnici da poduzme potrebne aktivnosti da Grad Sarajevo na zgradi glavne pošte u Sarajevu, ulica Obala Kulina bana, postavi spomen-ploču u čast narodnog heroja Fuada Midžića sa dvojezičnim tekstom (bosanski i engleski jezik).“

Odgovor:

Nadležna služba Grada Sarajeva će predmetnu inicijativu uputiti nadležnoj Komisiji za spomenike Grada Sarajeva na daljnje odlučivanje te provesti sve eventualne daljnje aktivnosti na podizanju ove spomen ploče.

III ZAKLJUČAK

Na pitanja koju su upućena na sjednicama Gradskog vijeća Grada Sarajeva, a na koje odgovore daju nadležne gradske službe, blagovremeno su dostavljani odgovori, dok na dinamiku dostavljanja odgovora na pitanja na koje odgovore trebaju dati vanjski subjekti, nadležne gradske službe ne mogu uticati.

Potrebno je istaći da se pitanja iz određene oblasti interesovanja ponavljaju, a razlozi su opravdani ukoliko na iste ne pristignu odgovori, a što se posebno odnosi na slučajeve kada su pitanja i inicijative upućene prema drugom subjektu, odnosno na tzv. „vanjske“ adrese, tako da se u konačnici, a uzevši u obzir prethodno postupanje u odnosu na predmet ove informacije, može smatrati i više nego zadovoljavajuće.

Obzirom na navedeno, može se konstatovati da je proces izvršenja u većoj mjeri zastupljen pozitivno. Postavljena pitanja, upućene inicijative i dostavljeni odgovori dokazuju aktivnost i efikasnost u radu svih nadležnih organa Grada Sarajeva, a što podrazumijeva aktivnosti gradskih vijećnika Gradskog vijeća Grada Sarajeva i u vezi sa navedenim postupanje gradonačelnice Grada Sarajeva da putem gradskih službi za upravu i stručnih službi na postavljena pitanja i iznesene inicijative pravovremeno i adekvatno reagira dostavljanjem odgovora Gradskom vijeću Grada Sarajeva, odnosno postupanjem po iznesenim inicijativama gradskih vijećnika, odnosno Gradskog vijeća Grada Sarajeva.